

Լուսագյուղ Մակերես՝ 8.65կմ²

Բնակչություն՝ 803

Գյուղ Ապարանի տարածաշրջանում, Ապարան քաղաքից հյուսիս-արևելք: Մարզկենտրոնից գտնվում է 34 կմ հեռավորության վրա: Նախկինում ունեցել է Գարանլըզ, Կարանլըղ, Կարանլուի, Ճանճիկ, Ջանջիկ, Քարագլուխ անվանումները: Լուսագյուղ է վերանվանվել 1948 թ-ին:

Գյուղի շրջակայքում 7- ռդ դարում կառուցվել է Թուխ Մանուկ եկեղեցին, որը, ըստ Ղեւոնդ Ալիշանի, հիշատակվում է որպես ս. Գրիգոր: Գյուղը տեղադրված է Ծաղկունյաց լեռների փեշերին, գտնվում է ծովի մակարդակից 1970 մ բարձրության վրա: Կլիման բարեխառն լեռնային է: Ձմեռները տեւական են, ցուրտ, հաստատուն ձնածածկույթով: Ամառները տաք են, համեմատաբար խոնավ: Հուլիսյան միջին ջերմաստիճանը տատանվում է 16-18-ի սահմաններում, հունվարյանը՝ -6,-8-ի սահմաններում:

Մթնոլորտային տարեկան տեղումների քանակը 450-600 մմ: Բնական լանդշաֆտները սեւահողային տափաստաններ են: Ունի աղբյուրներ: Գյուղի բնակչությունը ձեւավորվել է 1829-1830 թթ. Արեւմտյան Հայաստանից՝ Վանի նահանգի գյուղերից տեղափոխվածներից: 1831 թ-ին գյուղն ունեցել է 157, 1897 թ-ին՝ 501, 1939 թ-ին՝ 746, 1959 թ-ին՝ 620, 1979 թ-ին՝ 873 բնակիչ: Համայնքի բնակչությունը կազմում է 852 մարդ, որից 48% տղամարդիկ են, 52%՝ կանայք: Բնակչության մեջ մինչաշխատունակները կազմում են 25%, աշխատունակները՝ 63%, հետաշխատունակները՝ 12%: Ունի դպրոց, գրադարան, մանկապարտեզ, բուժկետ, կապի հանգույց: Գյուղն ունի 203 տնտեսություն:

Համայնքի տնտեսության մասնագիտացման ուղղությունը գյուղատնտեսությունն է:

Գյուղատնտեսական հողահանդակների հիմնական մասն օգտագործվում է որպես վարելահողեր, խոտհարքեր: Զբաղվում են բանջարաբոստանային, հացահատիկային, կերային կուլտուրաների մշակությամբ: Տնամերձ հողակտորներում կան բազմամյա տնկարկներ, զբաղվում են պտուղների մշակությամբ: Պահուստային հողերը զբաղեցնում են համայնքի մակերեսի մոտ 70%, որոնց մեջ 414 հա կազմում են արոտավայրերը, 25հա՝ վարելահողերը: Զբաղվում են խոշոր եւ մանր եղջերավոր անասնապահությամբ, զարգացած է կաթնամսատու ուղղությունը: Արդյունաբերություն չունի: Համայնքի հիմնախնդիրների մեջ կարելուրվում է խմելու եւ ոռոգման ջրի ջրագծերի, գյուղամիջյան ճանապարհների վերանորոգումը: